

AWIG - AWIG



**DESA ADAT KEDONGANAN KELURAHAN
KEDONGANAN - KECAMATAN KUTA KABUPATEN
BADUNG - BALI**

MURDHA CITTA MANUT DRESTA

Melarapan antuk Asung Kertha Wara Nugraha Ida Sang Hyang Widhi lan mawit saking manah susrusa, taler saking pasikian pakayunan Prajuru Desa Adat Kedonganan, Kertha Desa, Sabha Desa lan Prajuru Banjar sejabag Desa Adat Kedonganan sane sampun keanggehang linggihannyane, taler manut daging Awig-Awig Desa Adat Kedonganan Sarga VII indik nguwah-nguwuhin Awig-awig, saha nitenin kasukertan Krama Desa Adat sami sakala lan niskala manut kawentenan sekadi mangkin.

Desa Adat puniki wantah genah pesayuban Krama Desa Adat Kedonganan sami sumuyub miwah ngamel pangupajiwa, taler genah ngardi keluargania rauh kariwekas, mawit Dresta Desane punika keanggehang "Bhuana Agung" Krama Desane keanggehang "Bhuana Alit" maka kalih inucap tan keneng pasahang. Yan cutetang, ring sahanan tetangunan sane kesaratang pisan adung utawi patemon "BHUANA AGUNG RING BHUANA ALIT."

Mungguing ring Desa Adat Kedonganan puniki manut Dresta, patemon Bhuana Agung ring Bhuana Alit, risajeroning pangelaksana mangdane jangkep sehananing kahuripan kdasar in antuk TRI MANDALANING DESA inggih punika:

1. Tri Hita Karana

Teges ipun, nitenin tur ngetangan kasukertan pawongan saking nguni medasar antuk Tri Hita Karana, inggih punika paiketan pawongannya kelawan Ida Sang Hyang Widi (**Pahryangan**), paiketan tur sajeroning Pawongannya (**Pawongan**) lan paiketan risajeroning pawongannya kelawan wewidangannya (**Palemahan**), mawastu kasukertan Pawongannya ring Desa Adat Kedonganan manemu Jagadhita ya ca iti Dharma.

2. Tri Mandala

Teges ipun, nitenin tur ngetangan wewidangan Desa Adat Kedonganan saking nguni medasar antuk Utama Mandala, Madya Mandala miwah Nista Mandala (Ulu, Tengah, Teben).

3. Tri Angga

Teges ipun, nitenin tur ngetangan sehananin Krama Desa Adat Kedonganan mapekardi medasar antuk Tri Angga, luwire : Utama Angga, Madya Angga miwah Nista Angga.

Nguwah nguuhin Awig-Awig Desa Adat Kedonganan puniki kekaryaning antuk Krama Desa, sane kaenter oleh Prajuru Desa Adat, saha Para Angganyane wenten saking suang-suang Banjar sane wenten ring sajabag Desa Adat Kedonganan, mejalaran antuk ngewentenang Paruman Prajuru Desa, kasurat mejalaran antuk pakayunan gilik seguluk saluwung – luwung sebayantaka,

paras paros sarpanaya, sane sampun kacumponin antuk Krama Desa Adat maka sami dumadak Krama Desa Adat sami ledang ugi nyungkemin Daging Awig - Awig puniki, mangda ngamolihang kerahajengan miwah pengayoman saking Sang Hyang Parama Kawi.

SARGA I

ARAN LAN WEWIDANGAN DESA ADAT KEDONGANAN

Pawos 1.

1. Desa Adat puniki mewasta Desa Adat Kedonganan, medasar antuk Tri Hita Karana;
2. Jebar kakuwub Wewidangan Desa Adat Kedonganan mewates Nyatur Desa inggih punika :
 1. Sisi Wetan/ Kangin : Segara Kangin Desa Adat Kedonganan;
 2. Sisi Kidul/ Kelod : Desa Adat Jimbaran;
 3. Sisi Kulon / Kauh : Segara Kauh Desa Adat Kedonganan;
 4. Sisi Lor / Kaja : Desa Adat Kelan.
3. Kakuwub Wewidangan Desa Adat Kedonganan, manut Dresta medasar antuk Tri Hita Karana luwire :
 1. Tri Hita Karana, inggih punika wiwitane tetiga jalaran sidha memangguh ayu ring kauripan luwire ipun :
 - a. Parahyangan
 - b. Pawongan
 - c. Palemahan
 2. Tri Mandala, inggih punika anut kesusilan, kakuwub wewidangan Desa pah-pahannya medasar antuk Tri Mandala luwire;
 - a. Utama Mandala, Wewidangan Parahyangan;
 - b. Madya Mandala luwire pupulan karang-karang paumahan miwah wawangunan;
 - c. Nista Mandala, luwire margi-margi, rurung, tegal, teba, telajakan.
 3. Tri Angga, inggih punika manut kasusilan sehanan sane keutsaheyang taler kedasarin antuk Tri Angga/Tri Loka inggian pepalihannya;
 - a. Utama Angga;
 - b. Madya Angga;
 - c. Nista Angga.
 4. Tri Mandalaning Setra;

- a. Utama Mandala Mrajapati Pengulun Setra;
- b. Madya Mandala Palemahan Setra;
- c. Nista Mandala Sang Atuhu / Blibit.

Pawos 2.

1. Mangda dangan antuk ngenterang Krama Desa, nuntun miwah midabdabin Desane rawuhing pawongan miwah wawidangan palemahannya Desa Adat Kedonganan kepah dados 6 (nem) Banjar luwire;
 1. Krama Desa Adat, Banjar Pasek;
 2. Krama Desa Adat, Banjar Kerthayasa;
 3. Krama Desa Adat, Banjar Pengenderan;
 4. Krama Desa Adat, Banjar Anyar Gede;
 5. Krama Desa Adat, Banjar Ketapang;
 6. Krama Desa Adat, Banjar Kubu Alit.
2. Wewidangan Palemahan Banjar kemanggehang antuk Paruman Desa Adat Kedonganan.
3. Banjar patut madruwe piranti-piranti pamekasnyane Bale Banjar miwah Kulkul Banjar.
5. Krama Desa sane magenah riang suang-suang Banjar wenang kaepah dados Tempekan, manut akeh-kedik Kramane lan manut Pamutus Paruman Banjar.

Pawos 3

1. Suang – suang Banjar wenang ngardi Awig-Awig miwah Perarem.
2. Awig-awig miwah Perarem suang-suang Banjar tan wenang lempas ring Awig-Awig miwah Perarem Desa Adat Kedonganan, saha kecumpuin lan kelingga tanganin antuk Bendesa Adat.
3. Sehanan Tempekan Banjar tan wenang ngardi Awig-Awig miwah Perarem.

SARGA II

PAMIKUKUH LAN PATITIS DESA ADAT KEDONGANAN

Pawos 4

Desa Adat Kedonganan ngamanggehang pamikukuh inggih punika:

1. Pancasila;
2. Undang-Undang Dasar Negara Republik Indonesia Tahun 1945, pamekas Pasal 18B;
3. Undang-Undang Nomor 39 Tahun 1999 indik Hak Asasi Manusia;
4. Undang-Undang Nomor 23 Tahun 2014 indik Pemerintahan Daerah;
5. Peraturan Daerah Provinsi Bali Nomor 4 Tahun 2019 indik Desa Adat di Bali.

6. Peraturan Perundangan sane kemedalang olih Pemerintah lan Pemerintah Daerah.

Pawos 5.

Luwir Patitis Desa Adat Kedonganan:

1. Mikukuhin miwah ngerajegang Agama Hindu;
2. Nginggilang tata prawertine megama;
3. Ngerajegang kasukertan Desa saha Pawongannya sami sakala-niskala;
4. Ngerajegang tata sangakaraning Pawongan, pamekas sane ngiket Pakulawargan;
5. Ngajegang kasukertan saraja brana utawi arta druwen Desa miwah druwen Pawongannya sami.

SARGA III

SUKERTA TATA PARAHYANGAN

Palet 1

Pura Kahyangan Tiga

Sane kasinanggeh Pura Kahyangan Tiga ring Desa Adat Kedonganan manut dresta luwire :

1. Pura Desa lan Bale Agung
2. Pura Puseh
3. Pura Dalem :
 - a. Penataran
 - b. Kahyangan

Palet 2.

Pura Kahyangan Desa.

Sane kasinanggeh Pura Kahyangan Desa ring Desa Adat Kedonganan manut dresta, pura sane kaamong antuk krama Desa Adat Kedonganan luwire :

1. Pura Segara
2. Pura Toyaning
3. Gedong Ratu Ayu
4. Pura Melanting Jeladi Harum lan Granda Murti

Palet 3.

Pura Presanak Desa.

1. Pura Prasanak Desa inggih punika pura sane tiosan Kahyangan Desa lan magenah ring kulawarga
2. Pura Prasanak Desa kaemong olih kulawarga.
3. Sane kasinanggeh Pura Prasanak Desa luwire :
 1. Pura Tri Hyang
 2. Pura Parerepan Susunan Wadon
 3. Pura Dalem Besakih
 4. Pura Dalem Majapahit
 5. Pura Celuk Waru
 6. Pura Ratu Bagus Kulat
 7. Pura Penataran Pande
 8. Pura Pasek Kayu Putih
 9. Pura Prasanak Dalem Sakenan
 10. Pura Ratu Ayu Batur Sakti
 11. Pura Dukuh Sakti Telaga Wangi
 12. Pura Sudha Mala
 13. Pura Dalem Segara

Palet 4

Pura Swagina.

Sane kasinanggeh Pura Swagina inggih punika Pura sane kaempon olih pakulawargan krama Desa Adat Kedonganan.

Palet 5

Pura Dadia utawi Linggih Dewa Hyang (Pura Swawandhu)

Sane kasinanggeh Pura Dadia utawi Dewa Hyang inggih punika Pura sane kaempon olih kulawarga miwah soroh sane wenten ring kakuwub wewidangan Desa Adat Kedonganan.

Palet 6.

Indik Pamitegep Parahyangan

Kasinanggeh pamitegep parahyangan inggih punika tata cara ngelaksanayang upacara miwah upakara Panca Yadnya luwire :

Pawos 6

INDIK DEWA YADNYA

1. Upacara lan upakara sane kewastanin Dewa Yadnya, kelaksanayang ring Parahyangan-parahyangan Desa, Presanak, Dadia utawi Dewa Hyang (Swawandhu) lan Swagina. Tata cara lan paletan Dewa Yadnya mangdane wenten sor singgih utawi ageng alitnya upakara sane kelaksanayang mawit Kahyangan Tiga rauh ke Pura Dadia utawi Dewa Hyang, manut perarem-perarem lan penepas.
2. Suang-suang krama Desa kepatutan ngelaksanayang Dewa Yadnya rikala rerainan Purnama, Tilem, Galungan, Kuningan, Saraswati, Siwalatri miwah pujawali ring Merajan utawi Pura.

Pawos 7

1. Rahina tegak upacara piodalan penyanggra ngupahayu Jagat utawi Desa Adat Kedonganan ring Pura Kahyangan Tiga, Kahyangan Desa, Pura Swagina, Pura Prasanak minakadi sekadi ring sor :
 - ha. Pura Desa lan Bale Agung, Pura Puseh, miwah Pura Toyaning piodalannya rikala Saniscara Pon Wuku Dungulan, ngenem sasih apisan.
 - na. Pura Penataran piodalannya rikala rahina Redite Wage Wuku Kuningan ngenem sasih apisan.
 - ca. Pura Dalem Khayangan lan Prajapati, piodalannya rikala rahina Anggara Umanis Wuku Kuningan, ngenem sasih apisan.
 - ra. Gedong Ida Ratu Ayu piodalannya rikala rahina Anggara Kliwon Wuku Tambir, ngenem sasih apisan.
 - ka. Pura Segara pujawali rikala rahina Purnamaning sasih jyesta.
 - da. Pura Melanting Jeladi Arum, Grande Murti, pujawali rikala rahina Purnamaning sasih kelima.
 - ta. Ngaturang Idangan ring Segara Kangin lan Segara Kauh rikala rahina nemoning Tilem sasih kepitu.
 - sa. Makiyis (Melasti) kemargiang nuju sasih kesanga manut arah-arahan saking Guru wisesa
 - wa. Piodalan ring Pura Swawandu (Panti, Paibon lan Dadia) kesukserahan ring pangemong suang-suang .

Pawos 8

Pengaci ring pura inucap, manut kecap sastra agama, saha kelaksanayang nista, madya utama manut sekadi dresta.

Pawos 9

Pangempon suang-suang pura sane kasinanggeh Pura Kahyangan Tiga, Kahyangan Desa kaempon utawi kesanggra manut sekadi perarem.

Pawos 10. Indik

Pemangku

1. Ring Suang-suang Pura inucap inggian Pura Kahyangan Tiga, Pura Kahyangan Desa, Pura Swagina, Pura Prasanak miwah Pura Swawandu (Panti, Paibon lan Dadia) kawenangan ngadegang Pemangku.
2. Parikrama ngadegang Pemangku manut dresta luwire :
ha. Turunan utawi ngawaris.
na Nyanjang utawi masembaran ring ajeng penataran Pura inucap.
ca. Kacatri olih krama Desa melarapan antuk Paruman.
ra. Pura Swawandu (Panti, Paibon, Dadia) parikrama kesukserahan manut pangempon Pura suang-suang.
3. Tan kawenangan anggen Pemangku luwire :
ha. Cede angga luwire; peceng, perot, cungh, lan sapanunggilnya.
na. Sakit ila, ayan, buduh wiadin edan lan sapanunggilnya
ca. Sane madrebe kesucian tan becik, parilaksana corah, dursila
- 4.. Prebiya kepemangkuan mawiwit sekadi ring sor :
ha. Adhiksa widhi (ngawentenang), kamedalin saha kelaksanayang antuk sang ngadegang, makadi krama Desa utawi pangempon pura suang-suang.
na. Mapitra yadnya riwekas, Desa Adat wenang ngupacara Pemangku inucap manut pararem.

Pawos 11

1. Swadharmaning Pemangku luwire.
ha. Ngenterang upakara piodalan ring Parahyangan utawi ring suang-suang krama.
na. Tan wenang salah suluh, yan mamurug wenang pamangku inucap nyepuhin raga.
ca. Prade silih tunggil pemangku kapialang, utawi kacuntakan kengin nyudi pemangku tiosan utawi nuur sang sulinggih manut perarem.
ra. Semalihe yan sampun pemangku ngayah tigang rahina ring pura, prade wenten kulawargane padem, pemangku inucap tan keneng cuntaka, sakewanten tan budal selami piodalan.

ka. Tiosan ring upacara piodalan, sahaning yadnya sane ketangun olih Desa Adat, patut kesanggra olih pemangku Kahyangan Desa, Pemangku Prasanak lan Pemangku Swawandu Desa adat Kedonganan .

Pawos 12.

1. Petias utawi olih-olihan pemangku luwire.
ha. Penyolasan miwah sarin canang soang-suang pakubon krama Desa.
na. Luput pekaryan lan rerampe/reramon miwah pidagingnya.

Pawos 13

2. Pemangku kagentosin riantukan :
ha. Seda.
na. Pinunas ngeraga, menawi kegeringan lan sepenunggilannya.
ca. Kewusan antuk krama desane, menawi melaksana sane tan patut (asta duta).
ra. Prade Pemangku kewusan, sangkaning melaksana asta duta, lantur keni pamidanda manut perarem.

Pawos 14.

INDIK RSI YADNYA

1. Sang pacang madeg pandita utawi pinandita minakadi balian sonteng, kubayan, dalang, saka luiring jagi ngenterang yadnya patut masadok ring Prajuru Desa kalih Parisada Hindu Dharma Indonesia.
2. Prajuru Desa patut nitenin tur wenang ngalengin prade wenten kecihnan sasar kekecap miwah drestane tur sareng nyaksinin upakara saha nyobyahang ring paruman desa tegap rawuhing wates kawenangan pengenter yadnya.
3. Prajuru Desa wenang nyaksining upacara saha nyobyahang ring paruman desa tegap rawuhin wates kawenangan pengenter yadnya.
4. Krama Desa patut ngaturang ayah sepemadeg miwah ring pangelepas sang sulinggih riwekas katuntun antuk Prajuru Desa.

Pawos 15.

1. Sang sulinggih patut ngeriyining ngayunin ring wewidangan jagat Kedonganan, sesampunne puput wawu muputang yadnya kejabar tios jagat utawi kedura desa.

2. Krama Desa sami patut sareng nyitaning ketuntun antuk prajuru mangde sahanan yadnya sane kawentenang kaicen pamuput olih Pandita (Sulinggih) utawi pinandita manut kewenangannya suang - suang.

Pawos 16

INDIK PITRA YADNYA

Pamargin pitra yadnya madudonan manut sekadi ring sor :

1. Pangupakaran sang kelayu sekar :
 - ha. Antuk mendem utawi ngeseng, makecihne pakinsan ring Ibu Pretiwi utawi ring Bhatara Brahma.
 - na. Atiwa-tiwa (upakara pengabenan / pelebon)
2. Upacara pitra yadnya riwusan ngaben, kalanturang antuk upacara mamukur / meligia, ngelantur upacara nilapati utawi ngelinggihang Dewa Pitara, ring sanggah Kemulan Rong Tiga.

Pawos 17.

Swadarmaning lan tetujon prade wenten silih sinunggil krama kelayu sekar :

1. Sang keduhkita patut :
 - a. Nyadokang majeng Bendesa Adat lan Kelian Adat Banjar tur nunas tetimbang ring kawentenannya.
 - b. Ngaturin krama desa ring banjar ngeromba makarya eteh-ete sawa kedulurin panyembrama canang sasida antuk.
2. Swadarmaning Desa / Banjar
 - ha. Bendesa Adat lan Kelian Adat Banjar maritatas pamargin sang kaduhkitan napike pacang kependem, makingsan riyin utawi lantur keabenang.
 - na. Kelian Adat Banjar ngawentenang paswaran kulkul manut pawos 79
3. Penyangran banjar selantur ipun :
 - ha. Suang-suang krama desa ring banjar nedunin patus manut pararem banjar.
 - na. Ngeromba ngaryanin eteh-ete sawa saha kasarengin antuk krama desa ring banjar sane rawuh tedun.
 - ca. Sami krama desa ring banjar nyarengin ke setra jantos pamendeman puput.
 - ra. Krama desa ring banjar lanang istri ngambil karya manut dresta ngaromba rikala pangutangan, kapatut krama mabusana adat sanistane nyelempot/masesenteng.
4. Tan kengin ngelelet langkungan ring 14 (pat belas) rahina tur patut polih pagebagan manut pararem.

5. Tan kalugra nginepang bangbang miwah mendem rikala purwani, purnama, tilem, pujawali ring kahyangan tiga/desa, semut sedulur, kala gotongan, pasah, ingkel wong, pemagpagan kajeng kliwon lan kajeng kliwon.
6. Tan kalugra ngelaksanayang upacara atiwa-tiwa ritatkala pegattuakan, uncal balung, lan pawukon was penganten.
7. Tan kedadosang ngirim wangke sedereng ngelangkungin 3 (tigang) rahina.
8. Kelugrayang mendem manut paitungan :
Warak kruron miwah anak alit durung tumbuh untu, kepatutan pendem premangkin tan nyantos dewasa.

Pawos 18

1. Prade wenten krama tios mendem kekeninin penukun setra geng arta 500 (limang atus) keteng jinah bolong saha upakara jangkep.
2. Prade wenten krama sios ngawentenan upacara atiwa-tiwa taler keni penukun setra 500 (limang ngatus) keteng jinah bolong suang – suang sawa, utawi sane wantah makta galih taler keni panukun setra 400 (samas) kepeng jinah bolong.

Pawos 19.

1. Prade lampus sangkaning ulah pati/salah pati, kebengawan/anyud/kelem lan selantur ipun utawi sepenunggalannya kengin dados kebuat budal tur kaprateka kadi patut, sake wanten kemanggala antuk upakara banten penebusan lan pangulapan.
2. Prade wenten sang istri lampus ngadut manik tan wenang pendem sedereng bobotane embas. Kapatutan manik punika kemedalang antuk operasi olih dokter.
3. Prade kehanan wong lampus ring pekarangan, tegal, tepi siring / segara miwah genah-genah siosan wewidangan Desa Adat Kedonganan tan keni antuk ngelingan mangde kasukserah ring guru wisesa.

Pawos 20.

KECUNTAKAN

1. Sane kasinanggeh kecuntaka miwah sengkernia sekadi ring sor :
ha. Prade wenten sang istri lampus ngadut manik tan wenang pendem sedereng bobotane embas. Kapatutan manik punika kemedalang antuk operasi olih dokter.

na. Sengker cuntaka kalayu sekar ring bebanjaran :

- (i) Prade kependem/ngaben nadak cuntaka ngawit pabersihan sang kalayu sekar nyantos tigang rahina sesampun pemendeman.
- (ii) Prade atiwa-tiwa nyeka (ngerit) ngawit saking ngulapin nyantos tigang rahina sesampun pengutangan sejabaning ngelanus.

ca. Cuntakan kulawargane sejeroning pekarangan nyantos 12 (roras) rahina.

ra. Sang madruwe layon.

- (i) Durung makepus udel, cuntaka abulan pitung rahina (42) hari.
- (ii) Risampun makepus udel ngengalang cuntaka masuwe roras rahina.

2. Pabersihan Kecuntakan.

Ha. Kaluarga kelampusan mebersih antuk upacara makakelud.

na. Krama desa ring banjar mabersih antuk upacara / tirta prayascita.

ca. Ngeraja sewala, mabersih antuk mesiram –keramas, tirta pangening-ening.

ra. Ngembas putra, sane kacuntaka kawulawarga sane ngembas putra lanang wiadin istri.

ka. Pawiwahan, sane kacuntaka sang sane kaupekara pawiwahan lanang wiadin istri.

da. Karuron sane kacuntaka kulawargania lanang wiadin istri.

ta. Gamia gemana, sane kacuntaka sang sane ngelaksanayang gamia gemana.

sa. Anak Istri mobot tan alaki rabi manut dresta nenten wenten upakara pawiwahan.

wa. Mamitra ngalang.

la. Ngembas putra sedereng ngelaksanayang upakara pawidi widana.

3. Tan keni cuntaka luire :

ha. Sang sulinggih (Pandita), Pemangku Kahyangan Tiga lan Pemangku Khayangan Desa.

na. Rikala ngawangun yadnya ring kahyangan desa risampun ngalang/ngalang sasih.

Pawos 21.

1. Atiwa-tiwa/pengabenan kelaksanayang antuk :

ha. Nyawa resi utawi nyuwasta geni kemargiang seantukan galihe tan kekeniang utawi tan ngagah.

na. Sawa prateka kemargiang riantukan ngagah galih utawi mrateka sawa bah bangun.

2. Dudonan upacara pitra yajnya kadi ring sor :

ha. Ngaskara antuk ngagah galih utawi nyawa resi.

na. Pengutangan antuk ngeseng sawa .

ca. Pengiriman/nganyut kalanturan makekelud

ra. Nyekah/memukur/lantur nilapati / ngelinggihang Dewa Pitara.

Pawos 22.

Tata sulur pengabenan, pemendeman, lan Sengker desa ring ajeng maweweh kadi ring sor, nunas tirta ring Pura Dalem Lan Prajapati antuk upakara pejati sejangkepnyane manut sekadi perarem.

Pawos 23

INDIK MANUSA YADNYA

1. Manusa yadnya inggih punika upakara-upacara dharmaning manusa, ngawit saking petemoning kama petak kalawan kama bang sejeroning garba (waduk) ibiang nyantos lampus riwekasan.
2. Upakara-upacara ring ajeng luire :
 - ha. Megedong-gedongan duk pengerempinine ibiang.
 - na Duk sang kama reka/rare wawu embas.
 - ca. Rare Kepus udel
 - ra. Rare Nutug roras rahina
 - ka. Rare mayusa awulan pitung rahina (akambuhan = 42 hari)
 - da. Tigang sasih (asambutan)
 - ta. Nem sasih (awoton).
 - sa. Tutug kelih ngeraja swala wadone lan ngeraja singa ritatkala ngembakin lanange.
 - wa. Mapandes utawi metatah
 - la. Mawiwaha nganutin sulur
 - ma. Mawinten eka jati, lan selantur ipun.
3. Upacara upakara inucap nista, madya, utama nganutin dresta.
4. Upacara pawintenan manut sekadi paos ring ajeng prade pacang ngenterang yadnya utawi manut kabuatan, prade pawintenan ngeraga muwah pawintenan sinarengan, taler nganutin paos ring ajeng.

Pawos 24.

INDIK BHUTA YADNYA

1. Bhuta yadnya inggih punika, upacara-upacara, banten pabyakalan (pelaba) miwah pecaruan sarwa perani katur ring ibu pertiwi, ring natah / natar / palemahan pura-pura/sanggah, ring manusia, ring bebutan, luire sarwa :
 1. Tumuwuh/kayu-kayuan.
 2. Ingon-ingon (wewalungan).
 3. Lelandepan (sarwa besi)
 4. Gambelan
 5. Wewalian (Bale-balean).

Manut genah miwah penyawang lan rerahinan muah sasih sane kemenggahannya antuk ikrama Desa Kedonganan miwah ring suang-suang.
2. Upacara upakara pabyakalan ring pertiwi muah kahyangan lan bebhutan kebaos mecaru, kemargiang nista, madya, utama manut ring wiguna luire:
 1. Segehan
 2. Eka Sata.
 3. Panca Sata.
 4. Panca Sanak.
 5. Panca Kelud.
 6. Resi Gana
 7. Tawur Agung.
3. Yening wenten kedurmengalan Desa (jagat), kecirinin antuk
 - ha. Jatma kegeringan.
 - na. Tumbuh-tumbuhan kegeringan.
 - ca. Wewalungan kegeringan, miwah ceciren siosan sane ngawinang sasab mrana, patut kewentenang pecaruan manut sastra miwah Desa dresta
4. Taler siosan ring ajeng kawentenang upakara :
 - ha. Ring tilem kepitu kemargiang ngaturang idangan desa magenah ring tepining segara kauh lan segara kangin.
 - na. Tatuwek aturan ke segara wenten sedurung inucap samian aturane mapekeling ring Kahyangan Tiga.
5. Sajawaning ring ajeng kawentenan yajnya sesa sekadi majot-jotan nyabran wuusan ngerateng.

Pawos 25.

Upacara tawur agung kesanga rikalaning tilem kesanga :

1. Majeng ring Ida Bhatara Kahyangan Desa

- ha. Pengelong ping 13 melasti ke segara, kairing antuk prasanak sewidangan Desa Adat Kedonganan.
- na. Upakara ke segara keenterang antuk Prajuru Desa, keampok antuk banjar manut dresta.
- ca. Ring pangelong ping 14 nyejerang Ida Bhatara ring Pura Bale Agung.
2. Upakara tawur kesanga kemargiang ring Tileming kesanga, manut upacara sekadi ring sor :
- ha. Pecaruan kewentenan ring Catus Pata Desa Adat Kedonganan
- na. Nyoreang kawentenan pengrupukan ring kulawarga miwah ring desa kelanturan manut dresta.
- ca. Tan kelugra melila-lilayang antuk geni-genii muwah ngerupuk jantos langkungan tengah wengi santukan rerainan inucap sampun nampih rahina sipeng benjange.

Pawos 26

1. Upacara rahina nyepi/sipeng patut kamargiang catur berata :
- ha. Amati geni, sejawaning :
- Madruwe rare durung tigang sasih, ring genah rare inucap.
 - Metepetin ring sang sungkan.
 - Madruwe layon, wantah ring sawa inucap
- na. Amati karya, tan kengin nyambut gawe sejawaning Pecalang Desa lan Prajuru Desa miwah sang polih uak-uakan (ijin) antuk ilikita, pastika saking sang angawerat.
- ca. Amati lelungan, tan kengin melelungaan / melampah laku.
- ra. Amati Lelangunan, tan kengin masuara gora, maoneng-onengan (mepelalian) lsp.
2. Prade wenten krama mamurug brata penyepian, kaicen piceket-piceket/kedanda manut pararem.
3. Riwuus rahina nyepi kawastanin ngembak geni mapiteges pengelukaran catur brata penyepian kedulurin antuk Dharma Santi, suang-suang krama pakulawarga, Desa / Banjar mekadi pangawit icaka warsa anyar.

Palet 7

Indik Pamitegep Parahyangan

Pawos 27

1. Tan Kalugra Ngeranjing ke Pura
- 1.1. Sane ketiben kecuntakaan, mekadi sebel ngeraga minakadi :
- ha. Sebel kandel ngeraja swala, selami dereng mabersih.
- na. Sebel madruwe putra, selami 42 (petang dasa dua) rahina.
- ca. Sebel Pengantenan, selami dereng mabyakala.

- ra. Sebel riantukan madruwe keluarga kelayu sekar nyantos masepuh, makekelud.
ka. Kerangsukan sad ripu.
- 1.2. Makta sehanan barang, sinanggeh ngaletihin.
 - 1.3. Sato Agung, sejawaning rikala mapepada.
 - 1.4. Mabusana tan patut kadi tata caraning ngeranjing ke pura.
 - 1.5. Krama Tamiu lan tamiu sedereng polih (pituduh) prajuru desa
2. Pratingkahe tan wenang ring pura luwire :
 - 2.1. Masumpah (cor).
 - 2.2. Makobetan, masesenengan, masenggama, mebacin, mawarih, nyongsong busana, menahin pusungan (santukan rikala majejaitan patut ngelung busung macingor lidinnya).
 - 2.3. Mungguh tedun palinggih sejawaning pituduh Prajuru Desa /dulun Desa.
 - 2.4. Melukat.
 3. Sang mamurug kecaping ring ajeng, keni pamidanda pamrayasita sepatutnya.

.Pawos 28 .

1. Yan wenten jatma kerauhan ring pura, prade rumasa kasumanangsayan mangda kaluwuran.
2. Prade kahyangan kehanan kedurmanggala, minakadi kepancabaya pemangku patut digelis nyadokang ke Prajuru Desa, mangda marumang krama desane saha ngawentenang pamarayasita sepatutnyane.

SARGA IV. SUKERTA TATA

PAWONGAN Palet 1

Indik Krama

Pawos 29

1. Sehanang sang jenek mapaumahan ring Desa Adat Kedonganan sinanggeh krama tur kaepah dados tiga luire : Krama Desa, Krama Tamiu miwah Tamiu.
2. Krama Desa inggih punika : Krama sane megama Hindu tur ngeranjing mekrama.
3. Krama tamiu, krama Hindu sane jenek ring wewidangan Desa Adat Kedonganan nanging tan mipil ring Desa Adat Kedonganan.
4. Tamiu inggih punika krama ten megama hindu sane jenek ring wewidangan Desa Adat Kedonganan .

5. Indik Krama tamiu lan tamiu kaunggahang manut pararem.

Pawos 30.

Krama desa utawi krama desa ring Banjar wenten limang ayahan manut pararem.

1. Sehanan krama Desa sane sampun merabian patut tedun mekrama ngarep.
2. Sehanan krama Desa sami keni ayah mekadi ring sor :
 - (1). Ayahan utama (Sulinggih, Pemangku).
 - (2). Ayahan ngarep utawi / gegem.
 - (3). Ayahan pengele utawi Balu.
 - (4). Ayahan ngelitik utawi pedidi.
3. Sehanan krama desa sane teruna lan teruni keni ayahan yowana.
4. Satunggal krama manut dudonan kulawargannya patut keni ayah sinalih tunggil :
 - (1). Ayahan Utama.
 - (2). Ayahan ngarep.
 - (3). Ayahan Balu.
5. Ayahan ngarep sane sampun wenten sentanane merabian, wenang nyade ayahannyane kaseledihin oleh sentananya inucap.

Pawos 31.

1. Kulawarga sane megama Hindu wiwitan krama desa siosan, wenang ngeranjing mekrama desa prade pacang jenek mapumahan ring wewidangan kekuwub Desa Adat Kedonganan.
2. Sang ayat ngeranjing kadi ring ajeng, atur supeksa ring Kelian Adat Banjar sane ngewidangin genah paumahannya, atur inucap ring ajeng kadulurin antuk ilikita saking Banjar/Desa wiwitannya ngeninin indik paukudannya saha nahur linggih / pemopog manut perarem Banjar utawi Desane.

Pawos 32.

1. Sehanan krama desa sane sampun anom, suang-suang patut ngayah, kawastanin ayahan yowana teruna (sane lanang) miwah ayahan yowana deha / teruni (sane istri).
2. Ayahan yowana teruna miwah ayahan yowana deha punika kapupulang ring yowana Desa Adat Kedonganan, sekeha teruna miwah sekeha teruni.
3. Sekeha-sekeha punika kepah manut bebanjaran.

Pawos 33.

1. Desa miwah banjarnya mapaweh laluputan ayahan utawi pakenan-kenan ring sang inggiling linggih utawi sang kawelas asih.
2. Sor singgih leluputan miwah bacakan sang luput kaunggahang ring perarem.
3. Sejabanin Prajuru Desa, sane pastika patut polih laluputan pamekasnya :
 - (1). Para Sedaka.
 - (2). Para Pemangku Kahyangan Tiga
 - (3). Para Pemangku Kahyangan Desa.
 - (4). Sang sungkan tahunan.
 - (5). Wong Ceda angga banget
 - (6). Wong Alit Ubuh lan
 - (7). Wong keputungan tur wreda

Pawos 34.

1. Swadharmaning Krama Desa luwire :
 - (1). Drada atuang ring Desa
 - (2). Tinut saturut ring sedaging awig-awig, pararem-pararem miwah putusan perarem Desane.
 - (3). Tan maren ngutsahayang mangde Desa Adat sida nyujur tatujonnya kadi munggah ring pawos 5 ring ajeng.
 - (4). Natak panes tiis kertin Desa.
2. Krama Desa sinanggeh krama tamiu lan tamiu patut :
 - (1). Tinut tatiwak Desane ngenenin indik ngupadi sukerta Desane ring sakala.
 - (2). Tan wenten nungkasin kertin Desa.

Pawos 35.

1. Petiyas krama Desa luwire wenang polih pengayom Prajuru manut dresta ngenenin :
 - (1). Sangaskara kauripannya sane mabuat, sane mastikayang iketan sulur pakulawargan.
 - (2). Kasukertan miwah kasucian dewek, Parahyangan miwah karangnyane.
 - (3). Kasukertan druwenyane suang-suang
 - (4). Kabawosin tur katiwakin pamutus sehanan wicaranya.
 - (5). Nyarengin paruman Desa/Banjar, saha wenang mastikayang pamutus.
 - (6). Kengin sekadi ring sor puniki :
 - a. Mapewangkid
 - b. Ngemademang ayah-ayahan

- c. Ngetut ayah-ayahan, nanging tan kawenang antuk raja brana sane kemanggeh dharma miwah sima.
2. Sahanan krama Desa rawuhing sang sinanggeh krama tamiu lan tamiu wenang polih pesayuban ngemanggehang kasukertan raga, agama saha druwenya suang-suang.

Pawos 36

1. Sehanan Krama sane ngerobang utawi sane ngajak anak sewosan, lempas ring drestaning pakulawargan mekadi wong duduk-dudukan patut atur uning ring Kelian Adat Banjar.
2. Pesadok ring ajeng kaduluring antuk keterangan pastika, ngeninin linggih harta brana miwah tetegenan krama kalih sang kaajak inucap.
3. Kramane sane ngerobang/ngajak, patut tanggung samakuta negenang lampah sang kaajak arepe ring sukertan Banjar utawi Desane.
4. Kelian Adat Banjar ngunggahang pesadok punike ring ilikitanya saha nyobyahang ring paruman Banjar.

Pawos 37.

1. Krama sane nampi krama tamiu, tamiu jantos marerep, patut masadok ring Kelian Adat Banjar, manut pararem.
2. Prade tamiu pacang madunungan jantos langkung ring auku, Kelian Adat Banjar patut nureksein pisan mungging maka buatannya miwah ilikita.
3. Bilih-bilih yan pacang madunungan jantos asasih utawi awarsa suwenya, patut kaunggahang ring ilikita Banjar lan Desa, tur dunungan inucap patut sareng ketedunin masuka-duka baya pati.

Pawos 38.

1. Tedun mekrama desa ring Banjar sehanan ayahan, ngawitin nangken paruman banjar, sejawinin nganinin ayah balu kaetang pramangkin.
2. Sehanan wusan makrama keetang pramangkin.

3. Nangken ayatan panemaya inucap (Galungan), Kelian Adat Banjar suang-suang ngwantunin nyaca jiwa, ngetangan kalih mastikayang pekraman miwah ayah-ayahan kadi ring ajeng (1) ring wewidangannya suang-suang.
4. Mastikayang cacah jiwa, indik pekraman miwah ayah-ayahan kapikukuhin antuk pamutus paruman Banjar suang-suang dumugi kengin kelaksanayang.
5. Pemastika inucap digelis kasuratang ring ilikitan (pipil utawi kartu) Krama.

Pawos 39.

1. Sinalih tunggiling kulawarga wusan mekrama Desa, mejalaran antuk :
 - (1). Megingsir saking wewidangan Desa Adat Kedonganan, sangwusan makrama sangkaning magingsir patut nunas bebasan lan likita pastika saking Prajuru Banjar utawi Desa.
 - (2). Kenorayang antuk Desane, risampun mejalaran papuikan selami telung warsa tur taler tan praside ngesein solah maprewerti duracara / corah / lempas ring panepas awig-awig muah ayahan agama.
2. Sulur tur tata nganorayang :
 - (1). Pastika wenten dedosan ipun
 - (2). Ten tinut pituduh Prajuru indik nyupat raga, ngesein solah maprawerti
 - (3). Katiwakin pamidanda antuk paruman Desa risampun kapastika antuk saksi, ilikita bukti antuk Bendesa Adat.
 - (4). Pamidanda nganorayang inucap katur ring Pemerintah/Guru Wisesa
3. Sang wusan makrama tan wenten polih pah-pahan sangkaning druwen Desa utawi Banjar.
4. Desane wusan mapaweh pasubayan kasukerta sekeluwire arep sang kanorayang.
5. Banjar-banjar sejebag Desa Adat Kedonganan tan wenang nampi jadma sane kanorayang puniki.
6. Sang kanorayang inucap ring ajeng kengin katedunin malih mekrama maduluran antuk nutug utawi naur penanjung batu sepatut ipun.

Palet 2

Indik Pawiwahan

Pawos 40

1. Pawiwahan inggih punika patemoning purusa kelawan pradana, melarapan antuk penunggalan kayun suka cita, kadulurin upasaksi sekala niskala.
2. Pamargin pawiwahan luire :
 - 2.1. Mamadik/ngidih madulurin antuk suka citaning purusa kalawaning pradana sangkaning paiguman pakayun kulawarga sang kalih.
 - 2.2. Ngerorod/ngerangkad inggih punika pawiwahan sane metu wit sangkaning suka citaning lanang istri, wates kawentenang panglukuan rahina wengi, ngenjek ring pedesaan wenang ngeluku, sang maduwe umah sane kegenahin mapiuning ring Prajuru/Desa.
 - 2.3. Nyeburan utawi nyentana nyeburun, pawiwahan sane melarapan antuk suka cita sang lanang dados kapradana, sang istri keadegang dados kapurusa.
3. Pidabdab pawiwahan sane kapatutang :
 - 3.1. Sampun manggeh deha teruna (prasida nganutin undang-undang) mayusa 21 lanang, 19 istri.
 - 3.2. Sangkaning pada rena (tan pepaksaan).
 - 3.3. Manut kecaping agama (tan gamia gamana).
 - 3.4. Kawisudhayang prade pengambile tios agama.
 - 3.5. Nganutin administrasi sekadi penepas Undang – Undang Nomor 16 Tahun 2019
4. Perabian ring ajeng taler mangda nganutun U.U.No. 1 warsa 1974, saha P.P. No. 9 warsa 1975 miwah pasuaran sane kamedalan antuk Gubernur Bali.

Pawos 41.

1. Pawiwahan sane kemanggehang patut ring Desa Adat Kedonganan.:
 - 1.1. Sampun ngelaksanayang pawidhi widana sanistanin pabyakalan,, kapuputang antuk pemangku.
 - 1.2. Sajeroning natab pabyakalan marep istri mobot tan alaki rabi (bebinjat) patut nganggen keris lan carang dapdap rikala natab upacara pabyakalan.
 - 1.3. Sang ayat mawiwaha tios agama patut riyinan.
 - 1.3.1. Ngawentenang upacara sudhi widani/nyinutin dudonan ipun.
 - 1.3.2. Nyinahang angga matingkah manut adat lan agama Hindu.
 - 1.3.3 Ngaryaning pailikitan.
2. Pawiwahan sane tan manut kadi ring ajeng sinanggeh tan patut.

Pawos 42.

1. Piteges pawiwahan patut sang lanang marabi adiri, asapunika sawaliknya, sejawaning wenten pasubayan saking rabine utawi paetangan bawos, tur kesaksinin ring Prajuru Desa.
2. Prade wenten lokika sanggraha, patut sang mobotang wadone nyakapang, yan manut keni danda manut perareman tur ngupa jiwa rare embasang bobotane manut kadi UU Perlindungan Anak.
3. Prade dratikrama, paradara, mitra ngalang sane kabawos ngawiang cemar desa Adat Kedonganan, wenang kasisipan tur keni danda manut perarem.

Pawos 43.

1. Tata caraning pawiwahan patut kamargiyang sekadi ring sor :
Sapa sira ugi pacang ngewarangin pakulawarga patut masadok ring Prajuru Desa/Banjar selanturnyane Prajuru Desa/ Banjar maritatas manut tan manut kekecap perabiane.
2. Pemargin pepadikan manut dudonan kadi ring sor :
 - 2.1. Pemarginnyane jantos ping catur saha suang-suang malarapan.
 - Kapartama mesadok majeng Kelian Adat Banjarnyane.
 - Kaping kalih masedek / ngecub antuk canang.
 - Kaping tiga antuk canang kadi ring ajeng kadulurin pejati
 - Kaping catur antuk katipat bantal, kabawos pamuput pepadikan.
 - 2.2. Risampun puput mapamitan raris sang istri kaajak budal ring pakubon sang lanang saha ngelanturang antuk pabyakalan.
 - 2.3. Mangda puput tumus sekala niskala, raris kulawarga purusa mangkat pejati ring merajan/sanggah wadone.
 - 2.4. Memadik wong siosan Agama Hindu.
3. Prade ngerorod patut sekadi ring sor :
 - 3.1. Reraman sang purusa ngawentenang pejati/pengelukuan antuk duta sekiranya kalih diri nenten langkung sarahina ngawit saking ngarorod sejabaning ngelangkungin dura desa/samudra.
 - 3.2. Duta inucap nenten saking pakulawargan purusa.
 - 3.3. Pagenahan antene tan keiring ring pakubon lanange, sedereng mabyakala.
 - 3.4. Prade tan wenten pamilaku, kulawargan sang wadon patut masadok ring prajuru sane pacang sareng netesang.
 - 3.5 Ngerorod sareng wong siosan Agama Hindu.
4. Pamargin pakurenan / panglukuan patut :
 - 4.1. Kamanggala antuk nunas geng rene pangampura marep ring reraman sang wadon.

- 4.2. Kaiguman bawos idih-idih utawi kelegayang arep ring reraman sang wadon.
- 4.3. Kacihnayang indik kapurusa utama, prade santana rajeg kajejerang kapatut ngidih anak lanang sane kabawos pawiwahan nyeburin, risampun sulur pamerasan kategepin manggehang sentana nyeburui.
- 4.4. Prade panglukuane tan katerima, patut kelanturang jantos ping tiga.
- 4.5. Sampun ping tiga tetep ten ketrima.
5. Kacihnayang pamuput antuk sekala niskala, kulawarga lanang makta jejauman, tipat bantal, pejati merajan sang istri, jagi nunas mapamit sekadi dresta sane sampun memargi.

Pawos 44

1. Pamitegep seantukan wenten seserep rikala wenten wong ngerorod :
 1. Sang maseserep sane pacang netes pangerorodan patut masadok tur nunas panuntun ring Prajuru Desa / Banjar.
 2. Prajuru Desa / Banjar nureksa/netesang sesewrep punika, jati ten jatinya patut sampun wirang kulawarga sang ngerorod.
 3. Yan linggihnyane polih wirang, Prajuru Desa / Banjar patut gelis nganter seserep punika kakubon genah sang ngarorod.
2. Sang maseserep patut tinut ring sapituduh Prajuru Desa / Banjar :
 - 2.1. Ngeranjing kakubon inucap tan langkung ring kalih diri.
 - 2.2. Tan kengin makta gagawan/ sanjata sakaluir ipun
 - 2.3. Tan kengin matingkah kalih mabawos wakparusya utawi nantang
3. Sesampun sami pada napak, Prajuru patut nabdabin mangda tatacara panetasan trepti, maka pabuat ipun mangda anak istri sane ngerangkat jati-jati polih nerangan idepnyane sebeb ipun, luwire pidabdabe :
 - 3.1. Anak istri kagenahang ngeraga, tan dados anak siosan nampekin, sawatara 3 (tigang Depa) tur tinas/bebas ring iraga.
 - 3.2. Prajuru nyambatang pamekas ring sang istri, munggunng dana pacang ngicening pasubayan manut ring daging idep sang istri, yan pada arsa pangerorodane sang maseserep pacang katulak, yan saking papaksan sang istri kawaliang ring sang wirang/maseserep, yan lanang kaaturang ring sang ngawiwenang.

Palet 3. Indik

Nyapian

Pawos 45

1. Palas marabian sangkaning lila utawi mawiwit wicara pracihna tan tumus nemu suka citaning pananggaling idep alaki rabi mapiteges nyapian.
2. Wusan mapikuren santukan palas utawi sinalih tunggil lampus mapiteges balu.
3. Pawiwahan prasida kawusan melarapan antuk palas wiadin padem.
4. Sang ayat palas merabian sesampune masadok ring Prajuru Adat lan Dinas, nanging piteket nyane tan prasida katampi, kapatut atur supeksa pailikitan ring sang rumawos utawi Pengadilan Negeri wastu nunas apadang pemituse kebawos nyapian, nglantur Prajuru Banjar/Desa nyobyahang kawentenannya, saha kakeniyang pamidanda manut pararem.

Pawos 46

Tata caraning palas marabian

1. Sulur palas merabian inggih punika :
 - 1.1. Anasar laku.
 - 1.2. Nangken mojar sinanggeh wakparusya.
 - 1.3. Matilar tan pasadok jantos nem sasih.
 - 1.4. Setata imsa karma (KDRT)
 - 1.5. Tan prasida adung malih.
2. Yan wicarane ketumusang antuk lanange, patut makacihna :
 - 2.1. Istrine paradara utawi nasar lakunya
 - 2.2. Istrine amandel sanggama wiadin meambul-ambulan jantos enem sasih.
3. Yan wicarane tumusang antuk wadone, patut makacihna :
 - 3.1 Lanange dratikrana (sang lanang melaksana tan patut-patut mapikuren)
 - 3.2. Tan nyanggama saha ngupa jiwa istrin nyane jantos enem sasih.
4. Prade macihna wenten ilikita, bukti, saksi sang mawicaranang wiadin istri, manut sekadi angka (2) lan angka (3).
5. Palas marabian sangkaning pada lila sekadi ring sor :
 - 5.1. Nawur danda wiadin prabia pesaksi pada matenga
 - 5.2. Paguna kayan polih pahan pada matenga.
 - 5.3. Pabekel tatadan suang-suang kakuasan niri-niri muah warisan antuk purusa.
 - 5.4. Ngaweruhin muwah ngupa jiwa pretisentana manut swadarmaning guru rupaka.
 - 5.5. Nglung jinah bolong kesaksiang antuk Prajuru Banjar/Desa.
6. Pamidanda inucap kemargiang antuk prajuru Desa Kedonganan, risampun katiwakin pamutus antuk sang rumawos (Pengadilan Negeri).

Pawos 47.

Prade riwekas sang palas adung malih, patut sekadi ring sor :

1. Ngelaksanayang pawiwahan malih, manut sulur UU Perkawinan miwah tata cara pawiwahan sane patut ring Desa Adat Kedonganan.
2. Keni pamidanda nikel saking palas riyin, yadiastu palas pada lila.

Pawos 48

Balu inggih punika perabyan sane prasida kawusan malarapan antuk sinalih tunggil kepademan.

1. Balu manut pawongannya kabinayang dados :
 - 1.1. Balu luh wit sentana (sentana rajeg) miwah balu luh boya sentana.
 - 1.2. Balu muani kapurusan (wit sentana) miwah balu muani nyeburin (boya sentana).
2. Swadharmaning balu inucap patut :
 - 2.1. Ngemanggehang patibrata dan kengin ngemargian paradara utawi dratikrama.
 - 2.2. Nguasayang waris, pagunakayan, tan dados ngadol, ngadeang, makidiyang lan siwosan punika sejawaning kaluputan saking pianak utawi kulawarga purusa.
 - 2.3. Kengin ngidih sentana, prade wenten pidabdab sadurung sinalih tunggil padem, saha kebebasang antuk kulawarga sinanggeh kapurusa.
 - 2.4. Kawenangan mawiwaha malih, prade sampun polih paigum ring pianak (deha, teruna) wiadin kulawarga kapurusan.
3. Balu ligiran lanang wadon patut polih pengayom saking kulawarga purusa, salami ipun ngelaksanayang swadharmaning balu, saha ngupapira sekadi sesananing manusia.

Pawos 49

1. Balu sinanggeh tan pageh luire :
 - 1.1. Melaksana paradara utawi dratikrama.
 - 1.2. Matilar saking pakubon tan pasadok 6 (enam) sasih.
 - 1.3. Lempas ring swadharmaning balu.
 - 1.4. Tan parasida ngesehin solah maprawerti arep ring kulawarga purusa.
2. Yaning sampun macihna kadi ring ajeng manut tri pramana (ilikita, bukti, saksi) balu inucap tan polih upon-upon paguna kaya utawi warisan, kengin kamulih dana/trunayang.
3. Prada balu inucap pageh nganutin swadharmaning balu raris katundung antuk kulawarga purusa, wenang balu inucap polih pahan guna kaya miwah prabiya nyupapirin kauripan.

Palet 4. Indik

Sentana

Pawos 50

1. Sentana wenten kalih soroh luire :
 - 1.1. Preti sentana wiadin sentana rajeg.
 - 1.2. Sentana paperasan.
2. Prade wenten parabian tan patut ngawetuang sentana, mangda tan kantun kaucap astra utawi bebinjat, patut kamanggala antuk upacara pamrayascita.
3. Prade wenten parabian tan ngewetuang sentana, kengin ngidih sentana maduluran antuk upacara lan upasaksi niskala sane sinanggeh sentana paperasan.
4. Sentana paperasan mapiteges ngangkat utawi ngidih sentana sane kamenggala antuk sang ngidih kelawan reraman sang kaidih malarapan antuk parembungan ring kaluarga tur kailakita saking guru wisesa.

Pawos 51

1. Ngangkat sentana manut dudonan patut maka cihna artha berana pamerasan saha kesaksiang sekala niskala.
2. Sapa sira ugi pacang meras sentana, patut masadok dumun ring Prajuru Banjar / Desa Adat sanistane asasih sadurung pamerasan kamargiyang.
3. Prajuru adat patut nyobyahang ring karma desa sawewidangan desane, sang sape sire ugi saking kulawarga purusa tan lila mangda masadok ring Prajuru Banjar/Desa adat masengker kalih wuku sedereng pemerasan saking prajuru inucap.
4. Prajuru desa patut digelis mawosin tur ngicenin pamutus, dados tan dados pamerasan punika kemargiyang manut ring catur dresta miwah pararem.
5. Prade ring sengker punika tan wenten sane mesaksi upakara pamerasan patut kelaksanayang maduluran antuk upacara upasaksi sekala niskala.

Pawos 52

1. Paperasan sane kepatutan ring Desa Adat Kedonganan, risampun makacihna :
 - 1.1. Upacara widhi widana pamerasan.
 - 1.2. Keupasaksi antuk Prajuru Desa lan dinas, tur kesobyahang ring paruman.
 - 1.3. Wenten ilikita saha ngungguhang tata sulur pemargin pamerasan.
2. Sane patut kaperas kaanggen sentana kadi ring sor :
 - 2.1. Jadma sane kaperas nganutin tata cara meagama Hindu.

- 2.2. Kulawarga saking purusa.
- 2.3. Yan tan wenten saking purusa kengin saking wadon, prade taler tan wenten kengin saking arepnya (lila pekayunan).
3. Kengin meras sentana langkungan ring adiri lanang utawi wadon.

Pawos 53

1. Sane kemanggehang dados sentana, mangda molah maprawerti manut swadharmaning putra sesana tumus sekala niskala.
2. Sewaliknya sang memeras taler mangda maprawerti pateh sekadi pianak buah basang saha kaucap ahli waris saking sang memeras.

Palet 5

Indik Warisan

Pawos 54

1. Warisan inggih punika; tetamian artha brana saha ayah-ayahan ngupadi sukerta sekala niskala saking kaluhurannya arep ring turunanya.
2. Kang sinanggehang artha warisan luire :
 - 2.1. Duwe tengah, karang paumahan, pemerajan, pura sesuhunan.
 - 2.2. Paguna kaya, jiwa dana tatadan, utang piutang.
3. Wawu kengin kebawos warisan luire :
 - 3.1. Wenten sang mapiturun utawi pewaris.
 - 3.2. Wenten turunannya utawi ahli waris.
 - 3.3. Wenten artha berana, tetegenan, ayah-ayahan saking leluhurnya.

Pawos 55

1. Ahli waris luire :
 - 1.1. Perti sentana purusa.
 - 1.2. Perti sentana rajeg (sentana pradana).
 - 1.3. Sentana paperasan lanang utawi wadon.
2. Prade tan wenten kadi ring ajeng, sane dados ahli waris luire :
 - 2.1. Turunan purusa ngunggahang, mekadi rerama misan. Sameton guru rupaka.
 - 2.2. Turunan purusa naaning kesamping, mekadi keponakan misan mindon.

Pawos 56

Swadharmaning ahli waris patut :

1. Nerima tur nguasayang tetamian pahan saking kekeluhurannya mekadi, ngeremponin tetegenan sanggah, pura saha pengupakarannya miwah nyeledihining ayah-ayahan pewaris.
2. Ngabenan pewaris saha ngelanturang upacara-upacara yadnya.
3. Naurin utang-utang pewaris manut pengeluika.

Pawos 57

Pangepahan waris manut kadi ring sor :

1. Risampun kelaksanayang upacara pitra yadnya lan utang-utang pewaris buntas katawur.
2. Para ahli waris polih pahan pada, saking paguna kayan, sejawaning karang/ tegal ayahan desa sane keamong antuk ahli waris kasinanggeh karma desa ngarep.
3. Silih tunggil ahli waris ring ajeng tan polih pah-pahan prade :
 - 3.1. Nilar kawitan lan sesananing agama Hindu.
 - 3.2. Alpaka guru rupaka wiadin guru swadyaya.
 - 3.3. Sentana rajeng kesah mawiwaha muah sentana nyeburin, suang-suang kebawos ninggal kraton (ninggal kedaton).
4. Boya ahli waris kengin muponin hasil, manut dudonan luire :
 - 4.1. Boya sentana wadon salami durung kesah, mawiwaha utawi alpaka guru, Raris kawon antuk logika sanggraha mewastu madrebe pianak tur tan kaangken antuk wong tuan nyane, rare inucap kengin ngewaris wantah paguna kayan wadon inucap kemawon.
 - 4.2. Balu lanang wiadin wadon nyeburin ring pawiwahane pecak sampun kebawos ninggal kedaton.
 - 4.3. Mulih deha utawi teruna, riantukan ring pawiwahane pecak sampun kebawos ninggal kedaton.
5. Pawaris kengin maweweh rikala maurip pinaka jiwa dana, tatadan/bekel, makacihna maweweh tetep ring pianak sane kesah mawiwaha.

Pawos 58

Prade sajeroning pakulawargan wenten ahli waris langkungan ring adiri patut :

1. Kawentenang paiguman indik pedum waris inucap.
2. Yan tan prasida katunasang tatimbang ring Prajuru Banjar / Desa.
3. Prade taler tan wenten cumpu ring panepas Prajuru Banjar / Desa kengin katunasang ring sang rumawos/Pengadilan Negeri.

Pawos 59

1. Prade wenten kaputungan utawi nenten wenten ngewarisin Prajuru Desa wenang nureksa sulur pakuluwargan sane dumunan tur nyobyahang ring desa mangda kepututannya digelis nyeledihin karang inucap.
2. Yan prade wates pewanengan tigang sasih sesampun nyobyahang ring suang-suang Banjar tan wenten kulawarga sane nyeledihin karang inucap wenang kadaut antuk desa, maka serana upakara pengeruakan manut dresta muah perareman saha mereteka/pitra yadnya sang lina sane pecak ngemong karang inucap.

Palet 6

Kelembagaan Pemerintahan Desa Adat

Indik Prajuru Desa

Pawos 60

1. Desa Adat puniki keenterang olih Bendesa Adat
2. Banjar keenter antuk Kelian Adat Banjar.
3. Bendesa Adat lan Kelian Adat Banjar keadegang melarapan antuk pemutus parumannya suang-suang manut perarem.

Pawos 61

1. Bendesa Adat miwah Kelian Adat Banjar, suang-suang kesanggra antuk :
 1. Pangliman utawi petajuh
 2. Penyarikan utawi juru tulis
 3. Pesedahan utawi patengen pinaka pangemong druwen Desa
 4. Kasinoman utawi juru arah
 5. Pasayahan pinaka pangrencang.
2. Wewilangan penyanggrane madudonan anut ring akeh kedik Krama gegambelan miwah pekaryan.
3. Prajuru Desa inucap ring ajeng (1) kasudi olih Bendesa Adat lan Prajuru Banjar inucap ring ajeng (1) kasudi olih Kelian Adat Banjar suang-suang.

Pawos 62

1. Swadharmaning Bendesa Adat miwah Kelian Adat Banjar suang-suang luwire :
 - (1). Ngenterang paruman-paruman Desa/Banjar

- (2). Ngenterang pengelaksanaan sedaging awig-awig pararem-pararem, pasuare-pasuare lan sepenunggal ipun
 - (3). Ngeraksa saha ngatur padruwen Desa/Banjar
 - (4). Nuntun tur ngenterang Krama Desa ngupadi kesukertan sakala niskala
 - (5). Nuntun saha nyaksinin tata cara miwah sangaskaraning kauripan mabuat sane ngilitang sulur pakulawargan
 - (6). Nuntun saha ngenterang krama Desa / krama desa ring Banjar ngupadi nginggilang Sanghyang Agama, kesucian Kahyangan-kahyangan, kasucian pawongan, kesucian Palemahan miwah tata caraning ngangge Setra.
 - (7). Mawosin kalih niwakang pemutus marep ring wicara Desa/Banjar
 - (8). Make penyelidihi Desa utawi Banjarnya matemuang bawos ring sapasira ugi.
2. Tata cara ngelaksanayang swadharma ring ajeng, tan maren patut anut ring daging awig-awig, pararem, dresta miwah pamutus-pamutus paruman Desa utawi Banjar.
 3. Pengelaksanaan ring ajeng patut kesobyahang ring Desa utawi Banjar kapungkur ipun.
 4. Bendesa Adat miwah Kelian Adat Banjar, somakuta natak pamutus paruman Desa utawi Banjar ngeninin pengelaksanaan swadharmannya suang-suang.
 5. Swadharman Prajuru sane tiwosan wantah nyanggre nyerayanin Bendesa Adat, utawi Kelian Adat Banjar suang-suang manut dudonan.
 6. Ulih-Ulihan prajuru inucap manut kadi daging pararem Desa utawi Banjar manut dudonan.

Pawos 63.

- (1) Ulihan-uliha Bendesa Adat miwah Kelian Adat Banjar luwire :
1. Ayah miwah papeson tan pateh rupannia.
 2. Molih sekeluiring dumduman ring Desa/Banjar.
 3. Miwah ulih-uliha sewosan manut pararem Desa/Banjar.

Pawos 64

Kerta Desa

Kerta Desa inggian punika lembaga mitra kerja / prekanti Prajuru Desa sane ngambil pemutus parindikan wicara lan pamidanda manut sekadi hukum adat ring Desa Adat Kedonganan.

1. Kerta Desa inggian punika lembaga mitra kerja / prekanti Prajuru Desa sane ngambil pemutus parindikan wicara lan pamidanda manut sekadi hukum adat ring Desa Adat Kedonganan.
2. Kerta Desa mekadi baga pengabih ring sajeroning manggala desa miwah Banjar.

3. Kerta Desa kasudi antuk paruman nyabran 5 (limang) warsa tur kangkat kasudi malih sawawaning wenten perindikan siwos.
4. Bendesa Adat miwah Kelian Adat Banjar ring sajeroning ngelaksanayang swadharmannya patut mawirasa ring Kertadesa, pamekas rikala wenten pakewuh Desa utawi Banjar.
5. Kerta Desa makadi Pangelingsir inucap kawenangang mapaweh bawos pinaka tetimbang ring Bendesa Adat utawi Kelian Adat Banjar yadiastu tan kawidi.
6. Mungwing pawilangan angga Kerta Desa Adat Kedonganan manut makweh Banjar pinaka duta suang-suang Banjar.
7. Makweh pawilangan angga Kerta Desa Banjar manut paitangan miwah kawigunan suang-suang bebanjaran.
8. Indik papalihan lan tata cara ngadegang Kerta Desa manut pararem desa / banjar.

Pawos 65.

Sabha Desa

1. Sabha Desa inggian punika lembaga mitra kerja / prekanti Prajuru Desa Adat sane ngelaksanayang utawi ngecenin tetimbang mantuka Prajuru Desa Adat Kedonganan minakadi:
 - (1) Nyusun awig-awig miwah perarem desa adat.
 - (2) Ngrencana wewangunan desa adat.
 - (3) Ngrencanayang anggaran pikolih lan prabiya desa adat.
 - (4) Pelaksana program desa adat.
2. Indik papalihan lan tata cara ngadegang Saba Desa manut pararem desa / banjar.

Pawos 66.

Ngentosin Prajuru

Prajuru kagentosin riantukan :

1. Kelayon/lampus.
2. Pinunas ngeraga.
3. Kenorayang antuk Krama Desa / Banjar.
4. Tata cara ngentosin ring ajeng melarapan antuk paruman Desa/Banjar.

Pawos 67

Indik Paruman

1. Luwir paruman sane wenten ring Desa :

- (1). Paruman Desa
 - (2). Paruman Prajuru Desa
 - (3). Paruman Banjar
2. Sehanan paruman sida lumaksana yan sampun katedunin antuk sang patut nyarengin, majalaran suaran kulkul saha abusana adat (nyeleepot) manut dresta.
 3. Sehanan pamutus kautsahayang pisan mangda melarapan antuk suara gilik saguluk utawi beriuk sepanggul, bilih tan prasida beriuk sepanggul suara makehan sinanggeh pamutus.
 4. Ring sahanan paruman tan maren kemanggalain antuk pangarcana ring Ida Bhagawan Panyarikan maka sarana widhi widana cumung pengerawos utawi cane.
 5. Pengawit paruman kemargiang nyacah wilangan krama pamilet sane ngerawuhin miwah selantur ipun.

Pawos 68

1. Sehanan ayahan ngarep miwah ayahan balu, patut nyarengin paruman Desa miwah Banjar, saha wenang mastikayang pamutus.
2. Paruman Desa kelaksanayang senistane awarsa episan.
3. Paruman prajuru kawentenang sanistane asasih apisan.
4. Paruman Banjar kawentenang nyabran asasih manut dresta.
5. Luir paruman inucap ring ajeng, kawentenang padgata kala manut wiguna suang-suang.
6. Nangken paruman ring ajeng, Bendesa Adat utawi Kelian Adat Banjar patut nyobyahang pamarginnya ngenterang Desa utawi Banjar, pamekas ngenining indik :
 1. Munjuk lungsuring pakraman utawi ayah-ayahan.
 2. Pamargin panelas miwah sulur arta brana druwen Desa utawi Banjar.
 3. Pemargin usaha-usaha Desa / Banjar sane mabuat.
 4. Sehanan wicara saha pamutus-pamutusnya.
 5. Daging pararem-pararem miwah pasuara-pasuara sane mabuat.
 6. Rerincikan prajuru ngenanin usaha Desa / Banjare kapungkur.
7. Sehanan sane kasobyahang ring ajeng katitenin saha katiwakin pamutus antuk paruman Desa / Banjar.
8. Pamutus paruman inucap ring ajeng, sinanggeh sepat siku-siku patut katinutin antuk krama Desa / Banjar sami, pamekas antuk prajuru.

Pawos 69

1. Paruman Desa miwah banjar patut ngamedalang pararem-pararem anggen mitegepin awig-awig nunggal-nunggal manut dudonan.

2. Daging sehanan pararem patut tinut ring awig-awig.
3. Sane patut keunggahang ring pararem makadi :
 1. Dewasa ngawit pamargin bantang awig-awig sane mabuat.
 2. Rerincikan panyahcah daging awig-awig sane mabuat.
 3. Agung alit danda, panikel-panikelannia, lsp.
 4. Tata sulur ngemargiang daging awig-awig.
 5. Miwah sehanan indik sewosan anggen mitegepin daging awig-awig.
4. Paruman Desa wantah sinangreh pengawisesa sane wenang nyelemputihang tata pangenter Desa manut dresta.

Pawos 70

1. Paruman Desa kelaksanayang awarsa episan.
2. Paruman prajuru Desa Adat patut kawentenang sanistane ngesasih apisan.
3. Paruman inucap katuntun antuk Bendesa Adat.
4. Prajuru Desa wenang tur patut nyarengin paruman Prajuru Desa.
5. Paruman prajuru Desa kawenangan wantah ngerincikang parindik ngelaksanayang usaha miwah pangerencana sakeluwire.
6. Sehanan pamutus paruman prajuru sane pacang niwakin tetegenan ring krama desa, tan wenang kelaksanayang sedurung kasungkemin antuk paruman Desa utawi Banjar.

Pawos 71.

1. Paruman prajuru wenang ngamedalang pamutus anggen mitegepin daging awig-awig Desa.
2. Daging pamutus tan maren patut ;
 - (1). Tinut ring daging awig-awig.
 - (2). Manut ring agama miwah sima.
 - (3). Pastika nyantenang agung alit pamidandanya, yan kapurug.
 - (4). Kasungkemin ring sajeroning paruman desa

Palet 7

Indik Pamitegep Pawongan

Pawos 72.

Dusta Lan Baya

1. Krama Desa sane uning ring kawentenang jadmā melaksana dusta, patut digelis utawi pramangkin atur uning ring prajuru.
2. Laksanane sinanggeh dusta miwah baya kecaping ajeng luwir ipun :
 - (1). Jiwa Baya
 - (2). Arta Baya
 - (3). Geni Baya
 - (4). Pelegandangan
 - (5). Duracara ring agama
3. Bilih mabuat kawentenang ipun, sang uning inucap patut digelis nyuarayang kulkul Banjar anut ring kawentenang dustane.

Pawos 73

1. Krama Desa prade uning ring kawentenang baya utawi panangkan baya, patut pramangkin atur uning ring prajuru
2. Bilih mabuat kawentenang ipun, sang uning patut digelis nyuarayang kulkul Banjar.
3. Baya utawi panangkan baya munggah ring ajeng upami : umah puun, belabar lsp.

Pawos 74

1. Krama Desa sane keicalan/kemalingan prade pacang maseserep, patut polih pangestu utawi uak - uakan miwah panuntun ring Kelian Adat Banjar.
2. Prade genahe maseserep ngelangkungin Banjar sewosan, patut polih utawi uak - uakan saking Kelian Adat Banjar inucap.
3. Kelian Adat Banjar inucap ngicenin panuntun mangda tata cara maseserep manut kadi dresta.

Pawos 75

1. Krama Desa prade polih nuduk barang sekeluwire ring wewidangan Desa Adat Kedonganan, patut atur uning ring Kelian Adat Banjarnya.
2. Kelian Adat Banjar inucap nyobyahang barang dedudukan punika mangda sang madruwe mawantun ngamolihang barang sane. Sang mariangkenang patut nyidayang nerangan /
nyinahang
nyih
nyayang mungging barang punika wantah padruwenya.
3. Prade jantos tigang sasih tan wenten jadmā ngelingang wenang kadruwe antuk sang nuduk.

Pawos 76.

1. Pakaryan druwen krama desa sane kekaryanin panyanggran Banjar kasukserahang ring Banjarnya suang-suang.
2. Banjar wenang ngardi perarem ngemanggehang tata carane nyanggra pekaryan krama ring banjarnya mungguh ring ajeng.
3. Panyangran krama patut madarsana antuk arsa ledang paramatulung ring sang makarya, nanging tan maren miteketin kramane Desa ring Banjar.
4. Prade karya banjar abot, dahat Banjare wenang ngeruruh penampih ring Banjar sewosan.
5. Pekaryan sane kesukserahang ring penyanggran Banjare luwire :
 - (1). Ngupakara sawa jantos pengabenan yadiastu tanpa sawa.
 - (2). Sehanan yadnya sewosan sane katunasang panyanggra.
 - (3). Pekaryan sewosan manut perarem / dresta Banjar, upami ngingsirang sekeluwir wewangun/bale lsp.

Pawos 77

1. Pamargi panyanggra Banjar ring ajeng tan kengin kelaksayang sadurung kapituduh antuk Bendesa Adat.
2. Penyanggra inucap tan kasungguh patut tan maren ngadungang mungwing wibuh kancit, agung alit panyambraman lan pekaryan ring Banjar.

SARGA V.

SUKERTA TATA PALEMAHAN

Palet 1.

Indik Wates Desa Adat Kedonganan

1. Jebar kakuwub wewidangan Desa Adat Kedonganan $2.563.277 \text{ M}^2$ ($1.037.500 \text{ M}^2 + 1525.777 \text{ M}^2$) mewates nyatur Desa:
 - 1.1. Sisi Wetan/Timur : Segara Kangin Desa Adat Kedonganan;
 - 1.2. Sisi Kidul/Selatan : Desa Adat Jimbaran;
 - 1.3. Sisi Kulon/Barat : Segara Kauh Desa Adat Kedonganan;
 - 1.4. Sisi Lor/Utara : Desa Adat Kelan.
2. Kakuwub Wewidangan Desa Adat Kedonganan, manut Dresta luwire :
 - 2.1. Tegak Parahyangan Desa Adat Kedonganan;

- 2.2. Pupulan Karang Paumahan, sinanggeh Palemahan Desa Adat Kedonganan;
- 2.2. Setra, tegak ring kakuwub Wewidangan Desa Adat sejabaning Palemahan Desa Adat Kedonganan sinanggeh telajakan Desa.

Palet 2.

Indik Tri Mandalaning Desa Adat Kedonganan

Pawos 78

1. Manut Dresta Desa Adat Kedonganan medasar antuk Tri Mandalaning Desa luwire :
 - 1.1. Tri Hita Karana;
 - 1.2. Tri Mandala;
 - 1.3. Tri Angga/ Tri Loka.
2. Manut ring Tri Lingganing Desa miwah Tri Mandala, kakuwub wewidangan kepah dados tiga luwire:
 - 1.1. Utama Mandala mekadi tegak Parahyangan Desa Adat Kedonganan;
 - 1.2. Madya Mandala luwire; pupulan karang paumahan;
 - 1.3. Nista Mandala luwire : Tegal, Teba, Margi, Rurung, Tepi Siring, lan Lebu.

Palet 3.

Indik Palemahan Setra

1. Manut Dresta Tri Mandala Setra, kekuwub wewidangan Setra kepah dados tiga luwire :
 - 1.1. Utama Mandala tegak Pangulun Setra lan Pura Prajapati;
 - 1.2. Madya Mandala wewidangan Setra;
 - 1.3. Nista mandala Saha tuhu utawi blibit.
2. Mungguing Setra Desa Adat Kedonganan wenten Setra Ageng / Setra Gede miwah Setra Alit / Setra Rare.
3. Setra Ageng / setra gede genah mendem Sawa Wong Duur lan Setra Alit/ Setra Rare genah Sawa Wong Rare.

Palet 4

Indik Kulkul

Pawos 79

1. Kulkul Desa miwah Kulkul Banjar tan wenang katepak yan tan manut kadi daging Awig-Awig puniki, minakadi :
 - 1.1. Tetengeran upakara lan upacara yadnya Desa utawi Banjar;
 - 1.2. Tetengeran wenten Krama Desa Adat sane Seda/Kelayu Sekar;
 - 1.3. Tetengeran ngawit ngelaksanayang pakaryan sekadi sane kasobyahang;
 - 1.4. Tetengeran paruman Banjar utawi Desa ;
 - 1.5. Tetengeran ngurungang ngelaksanayang pakaryan;
 - 1.6. Tetengeran wenten Krama Desa keni Panca Baya (Kemalingan, Kepelegandang, Lebon Amuk, Kebegal utawi Kebaak , kebakaran lan Baya Pati Tiyyosan);
 - 1.7. Tetengeran tiyyosan manut Dresta.
2. Kulkul Desa Adat Kedonganan tan wenang katepak sejawaning wantah tetengerane patut katiwakang ring Krama Desa sami, upami Yadnya Desa, Paruman, Pakaryan Krama Desa sami miwah Kepanca Baya.
3. Suaran Kulkul inucap ring ajeng kewastaning :
Sanga Maha Suara Manggala Dharma;
 1. Sanga - Asiya (9);
 2. Maha - Ageng/Agung;
 3. Suara - Rengen (irama);
 4. Manggala - Pamucuk;
 5. Dharma – Kegamel.

Pawos 80

1. Kulkul Desa miwah kulkul Banjar tan wenang katepak yan tan sangkaning pituduh Bendesa/ Kelian Adat Banjar suang-suang manut dudonan, sajawaning rikala ngewentenang tetengeran ngeninin Kapanca Baya.
2. Sehanan kulkul Banjar sewewidangan Desa Adat Kedonganan punika patut nyarengin katepak, prade wenten sinalih tunggil kulkul Banjar/ Desa nyihnayang wenten kepanca bayan.
3. Sang nepak tan sangkaning pituduh, patut digelis atur supeksa ring Kelian maka buatan nepak kulkul kadi ring ajeng.
4. Suaran kulkul Sekaa-Sekaa sekeluwire ring Desa Adat Kedonganan tan wenang nyawurin suaran kulkul Desa miwah kulkul Banjar.

Pawos 81

1. Suaran kulkul tetengeran pekaryan patut ketedunin antuk ayahan manut daging dedawuhan;

2. Suaran kulkul tetengeran panca baya patut ketedunin antuk sehanan ayahan lanang ngarep rawuhing ayahan yowana lanang saha gegawan pamitulung manut bayane.

Palet 5

Indik Padruwen Desa Adat Kedonganan

Pawos 82.

Padruwen Desa Adat Kedonganan luwire :

1. Parahyangan Desa minakadi: Pura Desa lan Pura Puseh, Pura Bale Agung, Pura Dalem Penataran, Pura Dalem Khayangan, Pura Mrajapati, Pura Segara, Pura Toyaning, Pura Melanting lan Gedong Ratu Ayu;
2. Palemahan Desa, minakadi: Pelaba Pura, lan selantur ipun;
3. Tanah Setra;
4. Wewangunan;
5. Usaha Desa, sarana, utawi piranti piranti tiosan manut pararem.

Pawos 83

1. Munjuk lungsurin padruwen Desa sane marupa tanah palaba Pura miwah tanah tiosan patut pastika ilikitannyane;
2. Kawigunan tanah palaba Pura miwah tanah sewosan keparidabdab antuk Paruman Desa manut Patitis Desa Adat Kedonganan.

Pawos 84

- (1) Padruwen Desa Adat Kedonganan sane merupa Setra Ageng/Gede miwah Setra Alit/ Rare.
- (2) Setra Ageng/gede genah mendem Sawa Wong Duhur tur Setre Alit/ rare genah mendem Sawa Wong Rare.

Palet 6

Indik Wewangunan

Pawos 85

1. Nyabran ngawangun patut :
 - (1). Masadok ring Prajuru, utaman ipun prade wawangunan sane mapakilitan ring wates;
 - (2). Ngangge gaguat Asta Bhumi miwah gagulak Asta Kosala-Kosali, sanistane manut patitis niskala;
 - (3). Tan nyayubin kapisaga.

2. Nenten kadadosang ngawangun genah ibadah tiosan ring Krama sane meagama Hindu prade durung pastika indik Ilikitannyane;
3. Yening wenten pacang ngawangun genah ibadah tiosan ring meagama Hindu, ring wewidangan Desa Adat Kedonganan patut polih wak-wakan saking Prajuru Desa sane marupa Rekomendasi Desa Adat;
4. Nyabran ngewangun genah usaha wenang polih pangestu marupa Rekomendasi saking Kelian Banjar lan Bendesa Adat;
5. Rekomendasi inucap Pawos (3,4) patut medasar antuk Pamutus Paruman Prajuru Desa.

Palet 7

Indik Keresikan Desa Adat

Pawos 86

1. Mareresik ring sajeroning Palemahan Kahyangan Tiga, Parahyangan Desa miwah Setra Desa Adat Kedonganan, kelaksanayang olih Krama Desa Adat Kedonganan sanistane nyabran ngenem sasih, manut dedauhan tetengeran suaran kulkul Desa, sakewanten inggihan pareresikan ring palingih Parahyangan kemargiang olih Pemangku lan Juru Sapuh Parahyangan inucap.
2. Mareresik ring sajeroning Palemahan Desa Adat Kedonganan manut Dresta kalaksanayang olih Banjar suang-suang sawewidangan Desa Adat Kedonganan saha dudonan ipun kasukserah ring Banjar suang-suang.
3. Ring sajeroning nitenin karesikan Desa Adat miwah Banjar Adat lan genah-genah sane inggil ring sajeroning Palemahan Desa Adat Kedonganan, katitenin taler olih Pianak Krama Desa ring Banjar sane wenten ring sajeroning Pakilitan Sekaa Yowana minakadi pakaryan gotong royong miwah sekancannyane.
4. Indik karesikan ring sajeroning telajakan paswakarang kasukserah ring sang sane ngalinggihin karang inucap.

Palet 8

Indik Sukerta Pamitegep

Pawos 87

1. Sehanan karang paumahan patut :
 - (1). Pastika wenten wates ipun;
 - (2). Mapemedal ke rurung atawi ka margine (tan wenten Karang Kebebeng);
2. Bendesa Adat patut ngutsahayang mangdane pekarangane kadi ring ajeng kawertenane.

Pawos 88

1. Sehanan Krama patut ngewatesin pekarangannyane suang-suang nyantos side trepti nyatur Desa.
2. Wates karange sane majapitan, patut kategen makekalih oleh Krama sane majapitan kawates inucap.

Pawos 89

Tan wenang / ngenahang barang sane ngeletehin karang paumahan, bilih-bilih kaletahane ngelantur sinanggeh ngelimbak ngeletehin Desa manut Agama.

Pawos 90

1. Tanem tuwuh, tetangunan sakeluwire miwah tata nganggen karang tan wenang naonin miwah ngawanang pacol utawi ngeletehin karang penyandingnya.
2. Prade wenten sapunika, wenang kasepat gantungan utawi katiwakin pamidande siwosan.
3. Tanem tuwuh miwah tatangunan sane mabaya ring penyandingnya, wenang penyepat gantungannya adepa agung ngajeroang saking wates.

Pawos 91

Wewalungan

1. Sehanan krama sane miara sakeluwir wewalungan patut sayaga nitenin negul utawi nglogorin mangda tan wenten ngerusakin karang utawi abian krama sewosan, bilih-bilih jantos ngeranjing/ngeletehin Parahyangan;
2. Prade wenten wewalungan ngeleb saha ngeranjingan pekarangan sewosan sang madruwe karang patut malungguhang ring sang nruwenang wewalungane. Bilih yan ngawinang wenten kerusakan, kedulurin antuk nunasang bawos ring Kelian Adat Banjarnya, mangda katiwakin pamidanda, agung alit manut dedosane;
3. Bilih-bilih ring asasih jantos ping tiga sampun melungguhan wewalungane wenang ketaban (kategul/disita), penaban punika patut uningang ring Kelian Adat Banjar;
4. Wewalungan tetaban inucap wenang ketebus olih sang druwenang agung alit penebus katiwakin olih Kelian Adat Banjar, kedulurin danda manut rusakane sane kawetuang;
5. Bilih asasih jantos ping tiga mataban kadi ring ajeng wewalungane wenang keambil tan patut katebus. Pamargin naban malarapan antuk kawenangan Kelian Adat Banjar.

Pawos 92

1. Prade wewalungane sane ngeleb ngeranjing ke Parahyangan sang madruwe wawalungan wenang kasisipang antuk danda prebeyaning upakara pamarisuda sepatute;
2. Tata Cara melungguhan naban miwah nebas pateh sekadi ring ajeng.

SARGA VI.

WICARA LAN PAMIDANDA

Palet 1.

Indik Wicara

Pawos 93

1. Sane wenang mawosan mekadi mutusan wicara ring Desa inggih punika Prajuru Banjar / Prajuru Desa / Kerta Desa ;
2. Prade sang mawicara cumpu ring pemutus Kerta Desa kengin nunasang wicara inucap ring sang rumawos/Pengadilan Negeri;
3. Sekeluiring mawiwit kecorahan miwah nungkasin Daging Awig-Awig riastu marupa pasuara miwah Putusing Desa Adat/Banjar, Bendesa Adat / Kelian Adat Banjar patut digelis mawosin tan nyantos piuning malih;
4. Penepas Prajuru Desa Adat/Banjar mangdene nepek sekadi :
 - Sastra Dresta (manut ajaran agama Hindu);
 - Kuna Dresta (pemargining/pelaksanaan sane sampun saking riyin);
 - Desa Dresta (manut sane sampun kemargiyang ring Desa Adat Kedonganan).

Palet 2. Indik

Pamidanda

Pawos 94

1. Desa utawi Banjar wenang niwakang pamidanda ring krama sane sisip;
2. Paniwak inucap kelaksanayang antuk Prajuru Desa utawi Banjar;
3. Pamidanda sane katiwakang mangda pastika ring Catur Sandhi mekadi :
 - Sama : Krama/Prajuru pateh keni pamidanda;
 - Beda : Paniwak pamidanda wenang mabinayang manut sor singgih kasisipan;
 - Dana : Pamidanda kelaksanayang medasar antuk pikayun tresna sih;
 - Danda :Laksana utawi tatujon wantah merelina kasisipan utawi mapitulung ngemanggehang Kasudamalan Desa.

4. Pawosan pamidanda luwir ipun :

- (1). Dadosan antuk artha;
- (2). Penebus kasisipan antuk ayahan;
- (3). Upacara antuk banten;
- (4). Sapa sumaba (kesepekang) ring Desa/Banjar manut sengker;
- (5). Kebancutin, Kegurahin, Kesekung;
- (6). Kesah Katundung, Kapalasan;
- (7). Nunas geng pangampura ring Desa/Banjar.

5. Jinah utawi artha berana pamidanda rumanjing druwen Desa/Banjar.

SARGA VII

NGUWAH-NGUWUHIN AWIG-AWIG

Pawos 95

1. Nguwah-Nguwuhin Awig-Awig Desa punika kelaksanayang antuk Paruman Desa;
2. Paruman inucap mangda melarapan antuk pekarsan Prajuru Desa;
3. Pamuput bawos kasungkemin sajroning Paruman antuk gilik saguluk Krama Desa.

SARGA VIII.

PAMUPUT

Pawos 96


1. Awig-Awig puniki kewastanin Awig-Awig Desa Adat Kedonganan;
2. Awig-Awig punika kemargiyang ngawit kararemin.

Pawos 97

1. Sakaluire gaguat sane wenten sederengnya patut keanutang ring sedaging Awig-Awig puniki;
2. Sakaluire sane durung kebawos ring Awig-Awig punika, patut kelaksanayang manut tata cara sane sampun ketah mamargi kadulurin antuk Pararem.

Pawos 98

1. Awig-Awig puniki keraremin duk rahina : Sukra Umanis Purnamaning Sasih Ketiga, Saka Warsa 1911, pinanggal 15 September 1989, lan keuwah uwuhin rahina Redite Paing, Sasih Kenam, Saka Warsa 1943, pinanggal 7 Nopember 2021, ring Pura Desa Puseh Desa Adat Kedonganan;
2. Awig-Awig puniki kalingga tanganin olih Prajuru Desa Adat Kedonganan (Bendesa Adat lan Panyarikan), tur kesaksinin olih Ketua LPM Kelurahan Kedonganan, Lurah Kelurahan Kedonganan lan Camat Kuta, tur kapikukuhin olih Bupati Badung;
3. Luwir lepitane medaging aran Team Finalisasi Awig-Awig lan Pararem Desa Adat Kedonganan sane mawiwit saking Sabha Desa, Kerta Desa, Prajuru Desa lan Kelian Adat Banjar.



Kapikukuhin saha kalingga tanganin

Redite, 7 Nopember 2021

Olih

Bupati Badung


I Nyoman Giri Prasta, S.Sos

Lepitan : Team Finalisasi Awig-Awig lan Pararem Desa Adat Kedonganan

1. Drs. I Ketut Yutamana Slamet, M.Si. (Sabha Desa)
2. I Made Sumerta,SE.,MM,Ak. (Prajuru Desa)
3. I Nyoman Supertama, SE., M.Pd. (Prajuru Desa)
4. I Nyoman Sudarta, S.Sos. (Prajuru Desa)
5. I Ketut Supatra, S.Fil. (Sabha Desa)
6. I Ketut Suastana. (Sabha Desa)
7. I Ketut Gede Paramartha. (Sabha Desa)
8. A.A. Made Sukadana (Sabha Desa)
9. I Made Sumaita (Sabha Desa)
10. I Made Sudarsana, S.Sn., M.Sn. (Sabha Desa)
11. I Made Parka, SH. (Kerta Desa)
12. A. A. Alit (Kerta Desa)
13. I Made Widianana, S.Sos, M.Si. (Kerta Desa)
14. I Nyoman Buda Astawa (Kelian Adat Banjar)
15. I Wayan Sabar (Kelian Adat Banjar)
16. I Made Sukra (Prajuru Desa)
17. I Putu Suwendra, SH. (Sabha Desa)
18. I Wayan Sunarya (Sabha Desa)
19. I Nyoman Suendi, S.Pd. (Sabha Desa)
20. Drs. I Wayan Mertha, M.Pd. (Sabha Desa)
21. I Wayan Gede Parthama (Sabha Desa)
22. I Ketut Suarjaya (Sabha Desa)
23. I Made Agus Arsana (Kerta Desa)
24. I Wayan Sukadana, S.Sos., M.M. (Kerta Desa)
25. I Made Dartayasa (Kerta Desa)
26. I Nyoman Wita (Kelian Adat Banjar)
27. I Made Narka,SH. (Kelian Adat Banjar)
28. I Made Subudi, SH. (Sabha Desa)
29. I Wayan Widianantara, ST. (Prajuru Desa)
30. I Made Giri Supartha, ST. (Sabha Desa)
31. I Wayan Sukadana, ST., MT. (Sabha Desa)
32. I Wayan Suandika (Sabha Desa)
33. I Ketut Neraca

34. I Nyoman Sudarta, SE. (Kerta Desa)
35. I Gede Rai Wijaya, SE.,M.AP. (Kerta Desa)
36. Dr. Ni Wayan Umi Martina, SH.,M.H. (Kerta Desa)
37. I Wayan Sunarta, SH. (Kerta Desa)
38. I Ketut Budi (Kelian Adat Banjar)
39. I Wayan Sutarmanta (Kelian Adat Banjar)